

AEDk ereindako 40 fruitu

Herri ekimenaren geroa elkarlanean oinarritu dute euskara taldeek

A.ORMAETXEA / DONOSTIA

Euskara taldeen mugimenduen lehen urratsa Arrasaten (Gipuzkoa) sortutako Arrasate Euskaldun Dezagun taldeak eman zuen 1983. urtean eta orduz geroztik han eta hemen ugalduz joan dira herri ekimenak. Gaur egun tankera honetako 40 talde edo elkarte dago Euskal Herri osoan: 23 Gipuzkoan, 9 Bizkaian, 4 Araban, 3 Nafarroan eta bakarra Lapurdin.

Helburu bera dute denek: euskara eguneroko bizitzan harremanetarako tresna bilakatzea alegia. Horrek hizkuntza txoko eta arlo guztietara zabaltzea eskatzen du, baina hori ez da lehen inpresioan antzeman daitekeen bezain lan erraza. Lan honetan kezka, ardurak eta eginbeharrak anitzak dira.


Durangoko (Bizkaia) Berbaro taldeak duen kezkarik nagusia instituzio aldetik dagoen babes eza da eta hori dirulaguntza eskasean oinarritzen du Gorka Barrietabeña kideak. Bere aburuan, honek «frustrazioa» eragiten du lan egiteko prest egon arren trabak besterik ez dituztelako. Lan egiteko beharrezkoak dituzten lokalak «instituzioek ukatu» egiten dizkietela gaitzetsi du.

Lasarteko (Gipuzkoa) Ttakun-eko Jose Mari Iraolaren iritziz «euskaldunen komunitatea egituratu eta erabilguneak finkatu» beharra dago. «Ezagupena irakaskuntzaren bidez ziurtatua dago baina ezagupena eta erabileraren artean etena dago» arrazoi du Iraolak. Axun Aierbe Tolosako (Gipuzkoa) Galtzaundiko lehendakariak kezkarritzat jo du «erdaldunen integrazio» beharra, epe laburrera arazo larria izango dela baiteritzo. «Egiten dugun lana euskaraz egiten dugu baina argi daukagu euskaraz eginez ez garela erdal-dunengana iritsiko, hauengana heltzeko erdara ere erabili behar dugu kontzientziazio-motibazio lana egiteko».

POLIKI, ONGI, ALA BELTZ Legazpiko (Gipuzkoa) Euskal Txokoak, aldiz, «kili-

kolo» ikusten du euskararen aldeko taldeen mugimendua. «Norabideak agian baditugu baina jendearen mobilizazio ezak zaila egiten du gauza konkretuak egiteko herritarrek bilaraztea» baieztatu digu Jone Dorronsoro kideak. Eta iritzia berekoa da Mikel Arregi Iruñeko Zaldiko Maldiko elkartekoa. Bere ustetan, «erdi-purdikoa» da mugimendua, izan ere Euskal Herrian emaitzak lortzen ari diren bitartean, «Nafarroan hastapenetan baikabiltza oraindik».

Laudioko (Araba) Euskal Bat-eko Xabier Ugaldek dioenez, bestalde, mugimendua «poliki» doa, asmoak handiegia-



izaki «denetara heltzea ezinezkoa egiten baita». Honek «jitotze» sentsazio bat eragiten badie ere, aurrera ekiteko duten gogoa eta asmoa gainjartzen dira.

Berbaro eta Galtzaundik ideiak argi dituzte mugimendua osasun apartan ikusten dutela azpimarratzerakoan. «Azken aldi honetan ikaragarritzko indarrarekin hazten doa, bai kopuru aldetik eta baita bultzatzen dituzten ekintzei begira ere» dio Berbaroko Barrietabeña. Hots, euskararen aldeko borrokan sakontzeko bidea dagoeneko aurkitu dela gaineratu du.

Galtzaundiko Aierberen ustez, AEDk du mugimenduen arra-

kastaren «errua». «AEDk arrakasta izan duen heinean sortu dira antzerako elkarteak beste herrietan, eta porrot egin izan balu ez lirateke horrelako ekimenik sortuko» diosku. AEDk gaineratiko herrietako jendea euskararen aldeko mugimenduan barneratzea eragin duela nabarmendu du beraz Aierbek.

Dena den, euskara taldeen mugimendua bere bidea hasi besterik ez du egin. AEDk hamargarren urteurrena bete badu ere, gehienak azken bost urteotan sortutakoak dira eta urtebeteko bizia baino ez dutenak ere hor daude. Asko eta askok egitura sendotze lanetan dihardute oraindik, baina

gerorako bidea ere zehaztu beharra dago.

Geroa itxaropentsu ikusten dute talde hauetarikoz batzuek eta beltza besteek, baina denek azpimarratu digute etorkizunean lan egiteko ardatza elkarlana eta batasuna direla. «Euskaldunak elkartuz joan behar dugu eta horren neurrian erdal-dunak ere geuregana erakarri behar ditugu» esan digu Galtzaundiko Aierbek, eta Ttakun taldeko kide den Jose Mari Iraolak ere «koordinazioa eta elkarlana» bultzatu behar direla aipatu digu.

Orain arte egindakoa dexente da baina aurrera begira egiteko dagoena ikaragarria da.

BERGARAKO UDALA

Iragarkia

Bergarako Udalak Agorrsingo Udal Igerilekuetako mantenimendurako ardura-duna kontratatu behar du.

INSTANTZIAK

Instantziak aurkezteko epea 1993ko azaroaren 2tik 15eko eguerdiko ordu biak arte izango da.

Oinarriak eta informazio gehiago Idazkaritzako bulegoetan.